



Ponovno pokretanje željezničke linije

Vareš Majdan – Podlugovi

>>> ČITAJ VIŠE

Dana 14. decembra 2023. godine u Vareš Majdanu, svečano je otvorena obnovljena željeznička stanica Vareš Majdan i pokrenuta željeznička linija Vareš – Podlugovi. Svečanosti su prisustvovali direktor Adriatic Metals BH Paul Cronin, načelnik Općine Vareš Zdravko Marošević, ministar komunikacija i prometa Edin Forto i premijer ZDK Nezir Pivić, predstavnici Adriatic Metals BH, federalne i kantonalne vlade, kao i mnoštvo građana Vareša, koji su vrlo emotivno dočekali voz. Adriatic Metals BH je u suradnji sa Željeznicama FBiH obnovio željezničku stanicu i osposobio navedenu dionicu za saobraćaj.



Željeznička linija Podlugovi – Vareš koristit će se isključivo za teretni saobraćaj, za prevoz ruda koje će Adriatic Metals BH eksplotirati u novootvorenom rudniku u Varešu. "Ovi kilometri željeznice ne predstavljaju samo čelik, već i duh povezanosti i napretka, poboljšavajući društvenu, ekološku i ekonomsku održivost ovih regija. Sada smo više povezani nego ikad", rekao je Paul Cronin u svom obraćanju prisutnima.

Adriatic Metals BH je i ovom prilikom potvrđio svoju predanost kontinuiranom razvoju, ne samo kompanije, nego i lokalne zajednice.



OBILJEŽEN 21. DECEMBAR

Dan Rudara u organizaciji Adriatic Metals BH i Općine Vareš

>>> ČITAJ VIŠE

21.12.2023. godine, u skladu s tradicijom i s ponosom na bogatu rudarsku historiju, kompanija Adriatic Metals BH i Općina Vareš su zajednički organizirali svečanu proslavu Dana rudara.

Manifestacija je održana u Centru za kulturu i edukaciju Vareš, a prisutne su pozdravili predsjedavajuća Općinskog vijeća Vareš, Mahira Brkić, i načelnik Zdravko Marošević, koji su uputili čestitke povodom praznika. U svom obraćanju su istaknuli važnost vrijednog rada rudara, njihove posvećenosti i doprinsosa koji rudarska industrija ima na društvo u cjelini. Prisutnima se obratio i glavni tehnički rukovoditelj kompanije Adriatic Metals BH, Admir Silajdžić, koji se između ostalog dotakao i aspekata modernog rudarenja.



U sklopu programa, izvedena je „Rudarska pjesma“ a prisutnima su se obratili i učenici, stipendisti Adriatic Metals BH, koji trenutno poхађaju Mješovitu srednju školu Nordbat 2, smjer "Rudar u podzemnoj eksploataciji". Svoj doprinos svečanosti dali su i članovi udruženja "Moja prva nota" iz Vareša, koji su svojim izvedbama kreirali prigodnu slavljeničku atmosferu. Proslava Dana rudara bila je prilika za okupljanje i podsjećanje na ulogu i izuzetan značaj rudarske industrije za općinu Vareš.

EDUKACIJA ZDRAVI ZUBIĆI

>>> ČITAJ VIŠE



U prostorijama OŠ "Vareš" i OŠ "Vareš Majdan", Adriatic Metals BH je organizovao edukaciju Zdravi zubići, promociju oralnog zdravlja za najmlađe. U suradnji s Dr. Šejla Pošković, Spec. preventivne i dječje stomatologije, održana je edukacija i stomatološki pregled za učenike I i II razreda. Svi učenici koji su sudjelovali u edukaciji, dobili su nalaz i mišljenje s preporukom za očuvanje oralnog zdravlja. Cilj edukacije bio je podizanje svijesti o važnosti oralne higijene za cijelokupno zdravje organizma. Adriatic Metals BH i ovom inicijativom potvrđuje svoju predanost stvaranju zajednice koja je svjesna važnosti preventivnih mjera i brige o zdravlju.

INTERVJU S POLAZNICAMA KURSA KONVERZACIJSKOG ENGLESKOG JEZIKA

Najprije želim da Vam se zahvalim na izdvojenom vremenu i što ste pristali govoriti za naš bilten. Za početak nam recite nešto više o sebi.

Adna Adilović: Ja sam Adna Adilović, živim u Vareš Majdanu i imam sedamnaest godina.

Sumea Čusta: Moje ime je Sumea Čusta, imam sedamnaest godina i živim u Varešu.

Mia Šoljak: Ja sam Mia Šoljak, imam trinaest godina i isto živim u Varešu.

Šta Vas je motivisalo da se prijavite na kurs konverzacijskog engleskog jezika?

Adna Adilović: Moja najveća motivacija je bila da unaprijedim svoje znanje iz engleskog jezika i da podignem to znanje na veći nivo. Prije svega jako volim engleski jezik.

Sumea Čusta: Kao i Adna, željela sam da naučim nešto više i da unaprijedim svoje komunikacijske vještine.

Mia Šoljak: Kad sam čula da počinje kurs, ja sam pomislila da već znam dovoljno engleski jezik, pa sam se odlučila da se prijavim, da testiram svoje znanje i naučim nešto novo.

Šta mislite kako će Vam kurs pomoći u unaprijeđenju Vaših vještina komunikacije?

Adna Adilović: Pošto je to ipak konverzacijski kurs, mislim da će mi puno pomoći u budućim konverzacijama, obogatit će vokabular i izgraditi samopouzdanje.

Sumea Čusta: Engleski jezik se govori širom svijeta, tako da će biti korisno da se nauče nove riječi i vježba konverzacija.

Mia Šoljak: Obrađujemo teme koje se odnose na svakodnevnicu, naprimjer, muzika, književnost i druge teme o kojima se stalno razgovara, tako da će to olakšati svakodnevnu komunikaciju.

Šta mislite koje su to situacije u kojima će Vam pomoći ono što se naučili na kursu?

Adna Adilović: Naravno da postoje takve situacije, jer ipak je engleski jezik koji se najviše koristi u poslu, a bit će korisno kada upoznajemo nove ljudi.

Sumea Čusta: Slažem se sa Adnom. Engleski jezik će nam uvijek trebati i u poslu, a i kada budemo susretali i upoznavali nove ljudi.

Mia Šoljak: Mislim da će mi pomoći u privatnom životu kada budem putovala, ali i u poslovnom kada se budem prijavljivala za posao.

Po vašem mišljenju da li će Vam ono što ste naučili olakšati svakodnevnu komunikaciju?

Mia Šoljak: Mislim da hoće, jer nekada znam biti malo stidljiva, ali mislim da će mi ovo iskustvo pomoći da se oslobodim u komunikaciji.

Sumea Čusta: Isto kao i Mia, ja nekada pomiješam riječi, ali mislim da će mi kurs pomoći da napredujem.

Adna Adilović: Mislim da će mi kurs olakšati i pomoći da razvijam komunikaciju s drugim ljudima.

Postoje li neki određeni ciljevi koje ste željeli postići tokom kursa?

Sumea Čusta: Željela sam da unaprijedim svoje konverzacijeske vještine i u budućnosti ih iskoristiti za neki posao.

Mia Šoljak: Željela sam unaprijediti svoje čitanje, čitam jako brzo i nekada moje čitanje nije razumljivo.

Adna Adilović: Meni je također cilj bio unaprijediti čitanje. Kao i Mia, kada čitam, žurim.

Da li smatrate da će Vam unaprijeđenje konverzacijeskih vještina pomoći u međuljudskim odnosima?

Adna Adilović: Naravno, u Varešu ima dosta stranaca koji tu rade i koji ne govore naš jezik, ali uz pomoć engleskog jezika možemo komunicirati. Isto tako mi kada putujemo i želimo upoznati nekoga ili neku novu kulturu, možemo koristiti engleski jezik.

Mia Šoljak: Naravno, naprimjer ako se odselimo u inostranstvo, bit će nam od velike koristi to što poznajemo više od jednog jezika.

Sumea Čusta: Slažem se sa onim što su Mia i Adna rekle. Poznavanje engleskog jezika će biti korisno u raznim situacijama.

Šta mislite da li će Vam naučeno na kursu podići samopouzdanje u komunikaciji?

Adna, Mia i Sumea: Da, naravno.

Postoji li neki aspekt u vašem svakodnevnom životu da će Vam naučene stvari sa kursa olakšati?

Adna Adilović: Pošto često koristim internet, bolje poznavanje engleskog jezika će mi olakšati pretraživanje i korištenje interneta.

Sumea Čusta: Vjerujem da će poboljšanje gramatike i izgovora doprinijeti tome da budem jasnija i samopouzdanija u svakodnevnoj komunikaciji s drugima.

Mia Šoljak: Imat ću više samopouzdanja i bit ću slobodnija u komunikaciji na engleskom jeziku.

Hvala Vam puno za izdvojeno vrijeme.

Adna, Mia i Sumea: Hvala i Vama.



LIVING HISTORY PROJECT

Senada Parić

Prije svega da Vas pozdravim i zahvalim što ste pristali na intervju u sklopu projekta „Living History Project“ kompanije Adriatic Metals BH.

Za početak recite nam nešto više o sebi.

Hvala Vama na pozivu. Ja sam Senada Parić. Majka sam dvoje djece, završila sam srednju školu za Oplemenjivača mineralnih sirovina u Varešu. Trenutno sam zaposlena kao konobarica u lokalnom kafiću, a prije rata sam šest godina radila u Rudniku olova, cinka i barita "Energoinvest". Zadnjih desetak godina sam aktivna članica Odreda izviđača "Zvijezda", to mi je glavna sfera interesovanja i u tome istinski uživam.

Koji je bio Vaš prvi posao?

Moj prvi posao je zapravo bio posao čistačice, jer u to vrijeme nije bilo upražnjenih mesta za moje zanimanje. Predložili su mi da se zaposlim kao čistačica, da bih kasnije mogla samo da promijenim poziciju, bez da kompanija mora raspisivati natječaj. Nakon toga sam dobila posao Kontrolora reagenata.

Možete li nam reći kakva zajednica je bio Vareš u vrijeme dok ste radili u Energoinvestu?

Vareš je u to vrijeme bio živopisno mjesačce. Stanovništvo je bilo znatno brojnije, bilo je puno mladih, puno zaposlenih, a kulturni i društveni život bogat.

Šta je to što je Vaš posao činilo interesantnim?

Nisam sigurna da bi se to moglo okarakterizirati interesantnim, ali meni je dobronamjernost i susretljivost kolega bila vrlo značajna. Bila sam mlada, to mi je bio prvi posao, sve mi je bilo nepoznato, ali solidarnost i trud kolega da mi olakšaju proces adaptacije su bili zadivljujući.

Kako je izgledao jedan Vaš radni dan u Energoinvestu?

Imali smo organiziran prevoz iz Vareša do Tisovaca, radili smo u tri smjene po četverobrigadnom i trobrigadnom sistemu rada. Recimo, ako je na snazi bio četverobrigadni sistem, radili bismo četiri dana prvu smjenu, zatim četiri dana drugu i četiri dana treću smjenu, s tim da bismo nakon svaka četiri dana imali jedan slobodan dan. Po dolasku na Tisovce prvo bih se se presvukla u radno odijelo, zatim bih imala sastanak s floterom, kako bismo utvrdili koji reagenti se koriste taj dan. Nakon toga, radnici bi ubacili reagente u flotacijske bazene, a moj zadatak je bio da provjeravam ispravnost doziranja. Potom bih se vratila u ured da popunim tabele, koje bih svakodnevno predavala upravniku na kontrolu.



>>> ČITAJ VIŠE

Sjećate li se, koliko je je bilo zaposlenih žena i na kojim pozicijama?

U samoj proizvodnji bilo nas je nekolicina, dok su u laboratorijama i na administrativnim pozicijama uglavnom radile žene. Kada govorimo o rukovodećim pozicijama, tu su uglavnom bili zaposleni muškarci.

Da li se vodilo računa o zdravlju i zaštiti okoline?

Moje mišljenje je da se nije vodilo dovoljno računa o zdravlju i zaštiti okoline. Iako smo mi imali zaštitna odijela, prašina od barita bi prodrila i kroz tkaninu. Nerijetko bi se kupanje nakon posla pretvaralo u ribanje kože. Kada je riječ o selu, mislim da je dovoljno da kažem da zimi nije bilo bijelog snijega, cijelo selo bilo bi prekriveno sivim snijegom. Moram napomenuti da je, vjerovatno, jedan od razloga ovakvog, neadekvatnog pristupa zaštiti i činjenica da se koristila zastarjela tehnologija.

Aktivni ste i u Odredu izviđača "Zvijezda" Vareš, šta vas najviše motivira za takav angažman?

Da, već više od deset godina sam aktivna u Odredu izviđača "Zvijezda" i time se jako ponosim. Volim našu prirodu, čist zrak, vodu i to je ono što me najviše motivira, a izviđači su poznati kao istinski zaljubljenici u prirodu.

Sigurna sam da ste upoznati s Projektom kompanije Adriatic Metals, šta mislite kako će pokretanje rudnika utjecati na život u Varešu?

Da, jesam. Određeni napredak je već vidljiv. Također, zbog vaših uniformi, primjećujem da je mnoštvo mladih zaposleno u vašoj kompaniji. Nadam se da će u budućnosti doći još više mladih, da će vaš projekat ponukati i neke naše Varešane da se vrate u svoj grad. Uglavnom, mogu reći da je vaš početak zadovoljavajući.

Koji savjet biste dali mladima naše zajednice?

Prije svega, da im obrazovanje bude prioritet. Da pokušaju naći način da ostanu u Varešu i budu dio ove zajednice, da osnuju porodice ovdje i da nam škole budu pune đaka. Razumijem da postoje mlati koji su obrazovani i žele raditi u Varešu, ali nemaju priliku. Možda se uz rudnik razviju i neke druge privredne djelatnosti, pa im se pruži prilika.

Hvala Vam na izdvojenom vremenu

Hvala Vama.